

金剛心總持論

（非賣品）

敬印金剛心總持論貳萬貳仟本

普爲閱讀者迴向十方
助印

以此印經諸功德

普施十方盡法界

我與一切諸衆生

皆共一齊成佛道

發起負責督印者

釋 印 利

佛曆二五二三

年六月十九日

公元一九八八

前言

金剛論者。佛與菩薩問答之語也。篇中字字
眞修。言言妙道。與夫善惡因果。毫髮不
爽。普令法界有情。見者聞者。皆能祛迷剔
障。悟明自己本來金剛妙心。其功德不可思
議矣。幸閱者慎勿以泛泛而輕褻之。

翻印「金剛心總持論」的緣起

我今生有幸得到這本「金剛心總持論」，在閱讀研究此書覺得內容豐富簡單易懂，確是一本祛迷別障普度衆生的好法寶，倘若社會上一切人等，如果有緣得看到這本法寶，深思研究者，就能明心見性，入佛知見，悟佛知見，將來肯定有成佛知果。猶如貧人得寶閣裡逢燈，確實是一切有情的指路明燈，亦可稱爲是人生的無上至寶也。

故我閱後，在佛前跪下發了誓願今生身爲沙門，一定要盡我的微力翻印這本「金剛心總持論」兩萬本以上，作方便結緣力濟困迷利樂有情，普度衆生以報佛恩，而我常求諸佛菩薩的加被，所以於八八年六月二日得到星加坡大護法黃瑞娥居士爲首，代表星加坡衆善信樂助港幣三千五百六十元。以及十方方法界諸大善信的鼎力共同支持，所以則將樂助捐印「金剛心總持論」。法寶的各界人士芳名印於後，致使閱讀者以及助資印者，各則知之自然心生歡喜共沾法益同圓種智。

祖源禪師十魔亂正

師曰悟修禪那。非同細事。內外諸魔惱亂正定。少無主宰。貪着愛境。因境打動墮於魔網。本是善因反遭惡果。初學後昆愼之防之。愚開十條辨魔之義。自審自察。心魔天魔用慧觀照。消滅魔孽心垢若淨。諸障自泯。何怕天魔焉敢惑正。今將十魔而述於後。一者宿冤。二者外惑。三者煩惱。四者所知。五者邪見。六者妄想。七者口業八者病苦。九者昏沉。十者天魔。斯十魔障能撓正修。慕道之人謹之愼之。

問如何謂宿冤魔

師曰宿冤魔者爲之業障。遠劫今生在凡位中。不忠不孝不仁不義。殺盜淫妄貪嗔癡愛。多結冤家。今世會遇欲學大道。侵撓不安。能障聖事不得成就。須生慚愧懇禱懺悔。求哀三寶神力垂佑。一切宿業自消自滅。一切冤家自退自散。再發四願普利羣生。速得無漏急證菩提。參禪之人

須自懺之。

問如何謂外惑魔

師曰外惑魔者爲之人障。聞提小人貴賤不等。惱亂定心不得安穩。此無別故。皆是少權或缺禮義。或因自高或自我慢。或是口直或是行粗。或是仗勢或是誇才。或是言惡或是稱己能。或說他過或少和色。或無恭敬或肚不寬。或欠忍耐故召不信。惑亂修行。生心動念遮障本明。慕道之士須要卑下。退己養德方免人障。後學初進寬之忍之。

問如何謂煩惱魔

師曰煩惱魔者爲之事障。事障不除能亂正修。云何爲煩如何是惱。煩逐外境惱生內心。修禪之人定須斷之。如不頓除性定難現。見女生心淫心煩惱。見殺生心惡心煩惱。見財生心盜心煩惱。見物生心貪心煩惱。見人生慢我相煩惱。見卑生傲自大煩惱。見逆生嗔恚心煩惱。見順生喜隨

意煩惱。見冤生憎恨心煩惱。見親生愛私心煩惱。一切外見內生取捨。俱爲煩惱。難以盡述。參禪之流。定除事障。事障不空煩惱正定。後學之人胡不斷之。

問如何謂所知魔

師曰所知魔者爲之理障。理障不除能亂正定。云何所知如是之過。知我得悟知我通宗。知我明教知我會理。知我多文知我多見。知我戒嚴知我得定。知我有慧知我證空。知我自在知我無碍。知我得通知我得妙。知我證道知我成佛。等等所知爲之理障。理障不除法執不忘。法執不忘。真心不現。修禪定者必要泯之。

問如何謂邪見魔

師曰邪見魔者爲之執障。執障不除必墮邪定。云何邪見如是亂正。執性不壞爲之有見。執性本空爲之無見。執本不死爲之常見。執隨氣滅爲之

斷見。執無生有爲自然見。執氣化形爲邪因見。自如非有非無即有。即無一切邪執邪見。因緣自然不離空有。斷常兩頭自障本理。往隨歧路。參禪之流須知悟之。

問如何謂妄想魔

師曰妄想魔者爲之自障。自障不空生滅不停。顛倒散亂遮障本心。參禪之人須要空之。今舉一二以明妄障。妄想悟道。妄想修證。妄想得定妄想發慧。妄想多知妄想能文。妄想名遠妄想多供。妄想爲師妄想衆歸。妄想續祖妄想住利。妄想弘道妄想留錄。妄想得嗣妄想入藏。妄想神通妄想玄妙。妄想奇特妄想異怪。妄想長生妄想返童。妄想飛昇妄想成佛。諸妄不空動念乖真。初學慕道泯妄爲本。

問如何謂口業魔

師曰口業魔者爲之狂障。若不儉言縱意多談。散心亂念不得定心。口業

因何過之太甚。談玄說妙講教言宗。自誇得悟率他愚迷。論人長短說人是非。吟詩歌賦信口胡唱。平論古今邦國興廢。昔日賢愚今世凶善。不干己事。高言發怒。背面毀譽。當面稱譏。一切利割之言。使自妄失正念。參禪之人須要深戒。不但儉言養德。而且使心不亂。初機修行慎之忌之。

問如何謂病苦魔

師曰病苦魔者爲之害障。身多病疾皆因業愆。或自失調變生百病。不得受用學道有碍。愚開數條須自預防。調理脾胃節擇飲食。少食厚味且忌生冷。饑莫讀誦飽莫負重。食後勿睡。穴忌飽餐。好吃腐爛爰食煎炒。偏貪五味。強用非物濕地坐禪。風處打睡汗出入水。受暑貪涼。當風沐浴露卧星下。大饑大飽大喜大怒。大寒大暑大雨大露。內傷外感。一切失調。生諸疾病使身不安。後學須知預防避之。

問如何謂昏沉魔

師曰昏沉魔者爲之睡障。睡障不練昏沉太重。真心不朗慧性不發。隨在暗昧黑山鬼窟。其病何因多此昏障。皆因食重多貪厚味。語多喪氣勞形脾困。精神不清濁氣渾亂。愚癡多怒懈怠放逸。不念生死唯貪安樂。後學用功須發精進。引錐刺肉一頭觸柱禮佛燃燈。立儉徑行苦身磨鍊。睡魔方輕。不然縱意真心不朗。參禪之人勇猛降之。

問如何謂大天魔

師曰大天魔者非同諸障。皆因正修將以證道。心精通溜湛然不動。驚起天魔及諸鬼神。宮殿崩裂大地動搖。魔王驚怖魍魎荒越。一切魔魅俱有五通。同來惱亂不容人聖。變諸異怪化諸欲境。亂爾禪定。心生取捨。魔得其便主人受害。自發顛狂。爲己成佛。生陷王難。死隨無間。參禪

金剛果論第一

後趙天竺僧佛圖澄譯

開示初機論第一

如是我聞一時佛在靈鷲山中。清淨臺上與諸菩薩聲聞。天龍八部圍繞聽佛說法。時有無量初發心比丘比丘尼。優婆塞優婆夷各作是念。佛說大法我意不通願佛方便淺處開示。令我等輩悟佛知見皆得道果。若欲請問不得近前。爾時文殊師利菩薩知諸四衆心之所念。即作方便從座而起前白佛言。世尊。大慈願設方便開示初機。直指衆生見性成佛。乃爲末世初進佛門求道衆生。得正知見不遭邪惑。不假多功皆得道果。佛言善哉善哉。

金剛心論第二

文殊師利有大方便。請問如來開示三根。及於末世初入門者。修行正路。從汝所問當爲汝說。時諸大衆默然而聽。佛告文殊師利菩薩。有陀

羅尼名金剛心。能令衆生一見一聞便得道果。善男子云何名金剛心。此心人人本有。個個不無。是諸衆生自知自覺本等之心。何以故一切善惡皆出自心。自心修善令身安樂。自心造惡令身受苦。心是身主身是心用。所以者何。佛由心成。道由心學。德由心積。功由心修。福由心作。禍由心爲。心能作天堂。心能作地獄。心能作佛。心能作衆生。是故心正成佛。心邪成魔。心慈是天人。心惡是羅刹。心是一切罪福種子。若有人悟自心。把得定。作得主。不造諸惡。常修諸善。依佛行持。立佛行願。佛說是人。不久成佛。若有善男子。善女人。求佛道者。不明自心。名未成佛。若人明自心。達自性。依佛修行。決定成佛。勝如讀誦金剛經三十萬遍。功德無比。何以故。一切諸佛及諸佛。阿耨多羅三藐三菩提法。皆從自心流出。無窮無盡。不壞不雜。故名金剛心。悟此心者。名悟佛心。是故佛與衆生。心性一般。只因修與不修。信與不

信。所以有成佛者。有衆生也。

金剛經論第三

文殊師利菩薩問佛。云何名金剛經。世尊曰。金剛喻自性。經者喻自心。若人明自心。見自性。是人自己身中有經。六根門頭。常放光明。照天照地。具足恒沙功德。出生四果、四相、十聖、三寶。乃至如來三十二相。八十種好。一切功德皆從自己心地修成。不從外得。何以故。若是明心見性之人。常聞自己心佛。時時說法。時時度衆生。時時現神通。時時作佛事。得此理者。名持金剛經。名得金剛不壞身也。

四句偈論第四

文殊師利菩薩問佛。金剛經中佛常讚歎受持四句偈等。爲人演說。所得福德。勝將七寶堆滿東西南北。四維上下虛空布施之福。又勝初日分。中日分。後日分。乃至百千萬劫以來。恒河沙等身命布施之福。未審云

何是四句偈。佛言。一切衆生皆有佛性。本來不生本來不滅。只因迷悟而致升沉。何以故。衆生長迷不覺。所以永劫墮落。諸佛常覺不迷。所以永成佛道。若有男女求佛道者。進道功程。權分四級。號四句偈。一曰空身。二曰空心三曰空性。四曰空法。云何空身。身是父母所生。亦具父母息氣。九孔常流種種不淨。四大假合。終須敗壞。有知男女知身是幻。未死之前。當死一般。借此幻身。學佛修行。名悟身空一句偈也。復觀自心。非生非滅最聖最靈遇境似有。境滅還無。令悟真心。常覺不昧。不隨妄想流轉。但依眞性主行。名悟心空二句偈也。復觀自性寂然不動。感而遂通。變化無窮。威靈莫測。明明了了。自覺自知。靈靈寂寂。無爲常爲。名悟性空三句偈也。復觀如來所說經法。皆是方便。引導法門。如水洗塵。似病與藥。令證心空法了。病退藥除。名悟法空四句偈也。此四句義。乃是超凡入聖。進道門路。三世如來從此成

佛。十方菩薩。依此進功。所以者何。悟得初句意。依義修行。便證預流須陀洹果。悟二句意。依義修行。便證一來斯陀含果。悟三句意。依義修行。便證不來阿那含果。悟四句意。依義修行。便證無諍阿羅漢果。此四句偈。大開諸佛道門。受持讀誦。爲人演說。能令聞者。悟佛知見。成佛無疑。是故得福勝前七寶身命布施。所得福德。百千億分不及其一。

十種功德論第五

佛告文殊師利。前佛後佛一體。皆在各人自己。明心見性。修而成之。然則佛性人人本有。不投佛修終不成佛。何以故。爲無佛功。有求佛者。一用齋戒爲佛基址。二投明師。指示功程。三識心性。了了分明。四用作福。助初發根苗。五用結緣。增自善本。六明因果不妄主爲。七破邪魔。遠離外道。八用通理。不著有爲。九用精進。習佛行德。十用

通達。法法精明。若人具此十種功德。速成阿耨多羅三藐三菩提。

參求明師論第六

復次文殊師利。吾滅度後。末法年中。多有鈍根劣智衆生。心迷意醉。智暗情昏。雖有齋戒。並無智慧。愚心高傲。邪見自專。不肯下心。參求明師。正眞訣法。一向執著。認妄爲眞。或有執著。經書文字。或有執著。誦持名數。或有學得。一言一句。便爲究竟。未得謂得。未證謂證。修少善根。生大果望。是人愚迷。不會佛意。自誑自瞞。雖是善因。難逃惡果。何以故。種子不眞。所以不結菩提正果。一失人身。萬劫不復。

四生論第七

文殊師利問佛。云何四生。造何等業。受形稟命。種種不同。世尊曰。一切衆生。無始劫來。種種顛倒。念念不善。深迷自性。久戀塵緣。從